

欽定大清會典事例

卷

八百九十六至
八百九十九

工部
軍火

欽定大清會典事例卷八百九十六

工部

軍火

火藥三

道光元年議准。廣東省臘德大黃窖礮臺。各備火藥二千斤。橫檔鎮遠各三千斤。大虎礮臺五千斤。由理事同知製交水師提標中軍衙門發給。需款由洋商捐項開銷。○二年題准甘肅省玉門縣牛尾山開採硫磺五十萬斤。是年閏三月起七月止。如數採竣。即將磺洞封閉。○三年奏准鑲黃旗漢軍庫存火藥。移存西直門外礮

局。○又奏准。湖南省龍山桑植石門慈利四縣採硝。及長沙等縣招商煎熬土硝。除支用外。現存硝三十九萬斤有奇。足敷三四年之用。應請封禁。俟將次用完。再請採辦。○又奏准。湖南省湘鄉縣硫磺開採充裕。請即封閉。俟將次用完。再請開採。○五年奏准。五營新添槍兵什長。並舊設槍兵什長。共兵一千七百零五名。所有操演之火藥等件。照例行取。○又題准。廣西省新甯州屬隴本巖硝廠開採年久。巖空硝盡。應請封閉。○六年

諭。那彥成請停運藥鉛火繩。並籌議兵行供應一摺。此次吉林黑龍江官兵三千名。前赴回疆軍營協剿。所需藥鉛火繩。由京分起解送。各省派委員弁交替轉運。茲據該督奏稱。自京至甘。相距道路綿長。逐站更換車輛。供應較難。且長途遇雨受潮。恐亦不堪應用。前據鄂山奏明火藥鉛丸火繩。現已飭局多為製辦。甘省籌辦充裕。足敷調用。著將前項應解藥鉛火繩。未經起運者。留於京中各營配用。其已由京起運者。隨處截留。作為直隸各營操演之用。即於每年應造藥鉛火繩例價內扣除。其如何分營存貯之處。先行

報部備查。○又題准廣西省武宣縣龍華山硝巖開採年久。巖空泥盡。應請封閉。○七年題准甘肅省玉門縣牛尾山。招商採礪五十萬斤。分儲蘭州。涼州。肅州。玉門。平番。以供營用。限十箇月採足。題明封閉。○又題准廣東省英德縣貓耳峽等處產礪。先據題限二年開採一百萬斤。現已採足。應即封閉。○八年咨准自道光四年起。

皇帝在園庭打牲。及演試。

上用槍杆。試放外進槍。

大阿哥

南苑演圍。每歲隨圍。

乾清門侍衛三旗虎槍人員。並派赴

南苑打鮮等項。每年應用火藥。將近百斤。請自道

光七年十二月初四日領取硝磺之日為始。二

年請領一次。每次計領河南硝四百斤。明亮淨

磺一百二十斤。作為定額。以後設有武備院需

用火藥。應用硝磺之處。本庫另行咨部領取。○

十一年奏准。湖南省各營。配造火藥。歲支硝六

七萬斤。省局存硝將完。循舊派令龍山長沙等

四十四州縣。每年共採十萬四千斤。存硝充裕。奏明停止。○十二年題准。黔省各營衛配造火藥。歲支磺一萬一千餘斤。道光九年。採辦五萬餘斤。至是將完。勘得龍里縣老望山。修文縣六廣渡河坎等處。地勢豐厚。出產硫磺。請在該處開採五萬斤。○又奏准。援案在福建省上杭縣大巖背山。採磺十萬斤。採足即將磺礦封禁。○又奏准。廣東省綏徭廳排徭收藏烏槍未繳者。令送官給價收買。並禁姦民入寨私販火藥鐵器。鋪匠違例製造。查出治罪。失察地方官。一併

叅處。○又奏准。回疆各城需用硝磺。改歸綠營煎熬。非弁兵所習。仍舊由阿奇木伯克採辦交納。飭令綠營弁兵。嚴查私採私煎。不准稍有偷漏隱匿。一經訪獲。從重治罪。○又奏准。湖南省勦辦逆猺。今年額辦硝之各州縣。共加辦硝一十三萬六千斤。限一月解省備用。○十三年

諭。工部奏查明開採鉛斤。逾限未經足額。請飭查辦一摺。甘肅省安西州地方。開採鉛斤。係備供通省各營配兵操防要需。前於道光二年。經該督以該省所貯鉛斤為數無多。題請定限六年開採鉛五十萬斤。限

滿未經採足。茲據該督咨部。以曾經通飭各屬招商試採。未據報有產鉛之地。咨商鄰省酌議採買。亦未覆到。而各營近年操演。均動營中貯備之款。現在操演無鉛。請將督標等營寄存川楚軍需案內用贖鉛斤。並哈密營庫收存乾隆元年交到雍正年間軍需案內贖鉛。分別動撥應用。俟採辦購運到日。再為給發還款等語。此項備貯鉛斤。原為貯備緩急之項。該省各營操演。如因採辦維艱。即應先期妥議章程。題明辦理。乃遲延至五年之久。竟未設法採辦。以致各營操演無鉛。歷年均於貯備鉛內動用。茲復請以備

貯軍需案內贖鉛動撥應用。著兵部覈議具奏。並著楊遇春速議採辦章程具題報部辦理。查取採辦此案鉛斤遲延及督催不力文武各職名送部覈議。所有該省採辦未經足額鉛斤。即著如數籌補。並將歷年動用各營備貯鉛斤。一併補足還款。毋得再有遲延缺額。以重軍儲。○又議定硝斤條例禁之物。豈容民間私行埽買。應通行各督撫飭屬嚴禁。年終結報。其各直省匠鋪每年買用硝磺數目。並迅飭查明報部覈辦。○十四年

諭。楊遇春奏各營歲需操演鉛斤。俱係動用川楚軍需

案內存貯贍鉛。其哈密官庫存貯軍需贍鉛。亦係口
外各滿洲營按年操演動用等語。此項動用存貯鉛
斤。既係每年俱有奏銷。並非永遠備貯。不許動用之
項。著將此項歸補之後。將來按年動用抵銷。仍著查
照成案辦理。○又

諭。楊遇春奏籌補缺額鉛斤一摺。據稱甘肅省各營歲
需鉛斤。前經奏准在於安西州所屬之普城山。定限
六年。採鉛五十萬斤。以供領用。嗣因限滿未能足額。
所有動缺鉛斤。現經奉旨勒限歸補。未便分年採買。
請由黔省產鉛之區。照數代買黑鉛五十萬斤。搭附

來年額解運送湖北漢陽官局。即將存局黑鉛。先行照數撥給。咨明甘肅省赴楚領運。以補動缺。一面嚴飭安西州。並通飭各屬徧行躡勘。如有鉛苗旺盛之地。即奏請招商採辦等語。甘肅省近年操演。均動用營中備貯之鉛。所有動缺鉛斤。前經降旨勒限本年全數籌足。現據該督設法籌辦。試採需時。刻難歸補。請由黔省產鉛之區。照數代辦。著訥爾經額尹濟源裕泰體察情形。是否可行。悉心詳查妥議。據實具奏。甘肅省應行採買鉛斤。仍著該督嚴飭安西州。並通飭各屬躡勘鉛苗暢旺之處。即行招商採辦。俾省採

買運腳之費。以濟要需而供營用。欽此。遵

旨議准。由湖北漢陽局積存黑鉛內。酌撥四十萬斤。由

陝甘總督派員。照陝西赴漢口買鉛例限。齎價
赴楚領運。價銀照工部採辦黑鉛定例兌收。毋
任浮費。○又題准。甘肅省安西州普城山採鉛
五十萬斤。自道光二年至十二年。久踰六年之
限。洞老山空。不能足額。應即停採。將洞封閉。○
又題准。廣東省局存硫磺。將次用完。仍請在英
德縣貓耳峽等處開採。○又題准。貴州省營硝。
原議三年採辦一次。現屆估辦。道光二十一二

三等年額硝二十七萬二千二十四斤零。足數
即行封禁。○又

諭長清等所奏操演官兵火藥不敷撥運。酌議通融辦理。一摺。回疆重地。各城操防最關緊要。現在操演官兵火藥不敷撥運。必應通盤覈計。作速籌備。著准其於各城備貯火藥內。暫行挪用數千斤。以資操演。此項火藥。向係各城存貯。以備緊急之需。止可暫時通融辦理。挪用後。急須彌補完足。該參贊等務須酌量回力。上緊督催採辦。仍按年將動存歸補之處。由各城造冊報部覈銷。又另片奏查明阿克蘇擬撥火藥

二萬二千餘斤內。已用過六千餘斤。照部限半年內不能足數。請予限二年。上緊採辦等語。此次動用火藥。著予限二年。上緊採辦歸補封貯。斷不准再有遲延。又請展限。以重操防而昭覈實。○十五年

諭。工部奏覆查庫貯鉛子虧短斤數。至七萬八千餘斤。該管監督平日收管不慎。實屬咎無可辭。鉛子庫監督主事裕瑛候補主事張沆度著撤去監督。與前次派查呈報不實之員外郎清泰主事曾斌一併交部分別議處。○又

諭。工部鉛子庫監督向係一年更替。止有交代冊籍。並

無盤查甘結。嗣後著令交代之員。出具並無虧短甘結存案。並著工部堂官。每屆三年。揀派妥員。會同該管監督盤查一次。如有虧短。即著責令賠補。仍將該員等叅辦。儻派出會同盤查之員。並不認真查驗。扶同匿飾。經該堂官查出。亦著一併叅奏。

謹案鉛子庫滿漢監督現

改額設題缺滿員外郎漢主事各一員

○又題准。甘肅省營用硫

磺。將次用完。請在玉門縣牛尾山開採五十萬斤。現已採竣。即將磺洞封閉。○又議准。各省滿漢各營。演放礮位。除西安涼州滿營。廣西綠營。礮子向用鉛丸。全數揀回。並不開銷外。

盛京江甯杭州廣州滿營礮子。向係兼用鐵子鉛丸。鐵子全數揀回。鉛丸揀七銷三。京口滿營紅彝礮鐵子一項。係向江演放。改為揀九銷一。貴州一省。山徑叢雜。揀六銷四。其餘京營外省滿漢各營演礮鐵子鉛丸。俱揀七銷三。各營操演鳥槍所用鉛丸。貴州亦揀六銷四。餘仍揀七銷三。○十六年

諭。陳階平奏加工製造火藥。試有成效。並開列條款。請飭永遠遵行等語。軍儲利器。槍礮為先。全在提煉硝磺。精造火藥。方能致遠摧堅。據該提督奏稱。自到任